

Visoki predstavnik pozdravlja rezultate glasanja Parlamentarne skupštine Vijeća Evrope

Visoki predstavnik, Wolfgang Petritsch, je danas u Strazburu pozdravio rezultate glasanja Parlamentarne skupštine Vijeća Evrope, koja je preporučila Savjetu ministara Vijeća Evrope da odobri zahtjev Bosne i Hercegovine za prijem u članstvo Vijeća Evrope. Prijem Bosne i Hercegovine u Vijeće Evrope će značiti uspostavu novog međunarodnog partnerstva u procesu ostvarivanja zajedničkih vrijednosti, kao što su temeljna ljudska prava, vladavina zakona i pridavanje središnje uloge individualnim slobodama, za koje se zalaže Vijeće Evrope. Visoki predstavnik je rekao da će ovo takođe predstavljati značajan korak naprijed u procesu integriranja Bosne i Hercegovine u evropsku porodicu država.

U svom obraćanju Parlamentarnoj skupštini, Visoki predstavnik je pozvao na izglasavanje pozitivne odluke o prijemu BiH, naglasivši pri tome da se u toku prošle godine Bosna i Hercegovina značajno približila ispunjavanju normi koje moraju zadovoljiti sve članice Vijeća Evrope. Visoki predstavnik je rekao da uspostava vladavine zakona i poštivanje ljudskih prava svakog građanina predstavljaju srž procesa poslijeratnog oporavka BiH. On je naglasio napredak koji je postignut u toku posljednje dvije godine u ostvarivanju prava izbjeglica i raseljenih lica na povratak u svoje domove, i to, u velikom broju slučajeva, u područja koja su prije samo dvije godine smatrana uporištima nacionalista. Visoki predstavnik je takođe naglasio pozitivnu ulogu Alijanse za promjene, posebno pri usvajanju Izbornog zakona čime je uklonjena ozbiljna prepreka

za članstvo BiH u Vijeću Evrope.

Govoreći pred Skupštinom, Visoki predstavnik je podsjetio delegate da Bosna i Hercegovina još uvijek prolazi kroz proces dvostruke tranzicije – tranzicije iz rata u mirnodopsko stanje i tranzicije iz komunističkog sistema u sistem tržišno orijentirane demokracije. On je napomenuo da se Bosna i Hercegovina, sa svojom kredibilnom monetom i u suštini slobodnim tržištem, nalazi na putu uspostave temelja moderne ekonomije. Iako nisu ispunjeni svi uslovi za prijem BiH u Vijeće Evrope, Visoki predstavnik je izrazio svoje uvjerenje da će biti ostvareni i preostali zadaci.

Visoki predstavnik je rekao da će prijem BiH u Vijeće Evrope učvrstiti temelje za perspektivu Bosne i Hercegovine unutar Evrope. To će progresivnim snagama u BiH dati podršku koju s pravom očekuju od svojih evropskih partnera.